

SASTANAK STALNOG KOMITETA MEĐUNARODNE FEDERACIJE
GEOMETARA (FIG) U BEOGRADU

Nakon 30 godina ponovno je Beograd domaćin sastanku Stalnog Komiteta FIG-a, od 7. do 10. septembra 1966. godine.

Stalni Komitet FIG-a sačinjavaju delegati 26 nacionalnih geodetskih udruženja učlanjenih u ovu međunarodnu federaciju. Komitet se sastaje jedanput godišnje, svaki put u drugoj zemlji. Iako je to radni sastanak, na kojem se rješavaju tekuća pitanja federacije organizacija budućeg kongresa, raspravlja o radu tehničkih komisija, ovom sastanku prisustvuje redovito i, priličan broj učesnika, koji nisu delegati, tako da ovi sastanci predstavljaju po svom opsegu mali međunarodni kongres geodetskih stručnjaka. Na ovakvom »kongresu« nema stručnih referata i predavanja, ali neposredni kontakti stručnjaka, izmjene iskustava i mišljenja, upoznavanje zemalja i njihovog dostignuća na stručnom, tehničkom i kulturnom polju, predstavljaju veoma korisni način zbližavanja naroda i u okviru jedne relativno male struke kakva je geodetska. Zato se svaka nacionalna organizacija, koja organizira ovakav sastanak trudi da kolegama i gostima iz inostranstva omogućiti što ugodniji boravak, a istodobno da ih upozna sa razvojem stručne djelatnosti, razvojem zemlje uopće te ljepotama zemlje. Tako će ovom prilikom biti upriličena izložba geodetskih radova popraćena pisanim prospektom, kao tumačem pojedinih eksponata.

Uprava — biro — FIG-a povjerava se jednoj od nacionalnih organizacija, kojoj Stalni Komitet povjeri organiziranje Kongresa. Kongres se u pravilu organizira svake četvrte godine. Sadašnju upravu sačinjavaju članovi talijanskog udruženja, koji je organizirao Kongres u Rimu prošle go-

dine. Slijedeći Kongres FIG-a održat će se 1968. god. u Londonu, povodom 100-godišnjice Institution of Chartered Surveyors, prema tome uprava Federacije prelazi engleskim kolegama. Zanimljivo je da je pred 30 godina tj. 1936. biro Federacije bio u rukama engleskog udruženja, i da će se na ovom sastanku u Beogradu izvršiti simbolična primopredaja dužnosti dosadašnjeg predsjednika On. Geom. Ennia de Biagi engleskom kolegi vjerovatno sadašnjem potpredsjedniku Mr. Bernardu Collinsu. Ta simbolična primopredaja sastoji se u tome što dosadašnji predsjednik, na uobičajenom banketu, predaje svom nasljedniku pozlaćenu ogrlicu sa amblemima Federacije.

Na svečanom otvorenju učesnike će pozdraviti Savezni sekretar za industriju drug Hakija Pozderac i direktor Savezne geodetske uprave drug Vašo Blagojević.

Program rada ovogodišnjeg sastanka za ova četiri dana je prilično zgušnjut. Uz sastanke Komiteta predviđen je prijem kod predsjednika Skupštine Beograda, prijem predsjednika SGIG-a, prijem kod saveznog sekretara za industriju druga Hakije Pozderca, predstava za delegate u beogradskoj operi. Otvorenje izložbe koja će nositi naslov »Razvoj geodetske aktivnosti u Jugoslaviji« bit će 9. IX. Predviđene su u toku sastanka dvije ekskurzije, jedna na Avalu a druga u Derdap, gdje će učesnicima sastanka biti prikazani radovi na izgradnji ovog velikog hidroenergetskog objekta. Konačno je i zajednički banket, na kojem će se obaviti spomenuta simbolična primopredaja biroa Federacije.

Sastanak će se održavati u krasnom Domu Omladine Beograd, Makedonska ulica 13, u kojoj će biti i izložba geodetskih radova. M. J.